



Nuuk 4. marts 2016

UPA 2016/145

Inatsisartut suleriaasianni § 36 naapertorlugu Inatsisartuni oqallisissiatut siunnersuut una saqqummiuppara:

Nunatta nunatut nunarsuarmioqataasutut qanoq inissisimanera qanorlu nunani allani nunallu tamalaat akornanni sorsunnerit pisullu allat pequtugalugit inuttut ajunaarnersuartoqartillugu Nunatta qanoq pisarnissaa, nunallu tamalaat akornanni ikiuiniarnerit qimaasunillu tigusiniarnerit nunanit tamalaanit peqataaffigineqartillugit Nunatta qanoq inissisimasarnissaa pillugu Inatsisartuni oqallisissiatut siunnersuut.

(Inatsisartunut ilaasortaqa Sara Olsvig, Inuit Ataqatigiit)

Nunarput nuna piitsuujunngilaq. Aningaasarsiorneq pitsaanerpaamik ingerlanngikkaluartoq inuiaqatigiinni atugarissaarnermik pisortat akiligaannik ingerlatsinissamut akissaqarpugut. Nakorsiarneq akeqanngilaq, atuartitaaneq akeqanngilaq, ikiorsiissutinik innuttaasut akornanni nammassinnaavut malillugit neqerooruteqartarpugut. Politikkikkut oqallisigiuassavarput inuiaqatigiittut aningaasaativut ersoqatigiinneq tunngavigalugu innuttaasut akornanni agguartarnerlutigit. Tamattami nalunngilarput nunatsinni innuttaasut akornanni atukkat naligiinngingaarmata inoqateqartugut pissaqarnikkut piitsutut inissisimasut allallu pissaqarluarlutik aningaasaqarnikkut eqqasuuteqaratik atugaqartuusut.

Oqallisissiarli una nunatsinni pissaqarnikkut piitsuussutsimut tunnganngilaq. Piitsuussuseq nunatsinni atugaasoq naligiinnginnermiillu pilersitaasoq politikkikkut allatigut aaqqitassaavoq Inuit Ataqatigiinniillu isumaqarpugut naligiinnerulernissamik suliniuteqarneq maanna pimoorunneqartariaqartoq.

Oqallisissiaq una nunatut anersaakkut nukittuumik inissisimanissamut tunngavoq. Nunarsuarmioqataaernermit tunngavoq. Nunatut namminiilivikkiartutaartut nunarsuarmioqatigiit akornanni immitsinnut qanoq isiginitsinnut qanorlu akisussaaffeqarnitsinnut tunngavoq. Inuit Ataqatigiit isumaqarpugut mattulluta immikkoorluinnarluta nunarput ingerlassinnaanngikkipput.

Nunarsuarmioqataasutut avataanit nunarput assigiinngitsutigut pajunneqartarpoq taperneqartarlutalu, tuniorarneqaannaratali uagut aamma tunniussaqaqarnissatsinnut akisussaaffeqarpugut.

Ukiarmi Inuit Ataqatigiit siunnersuutigaarput Syriami sorsunnermit inuit qimaasut nunartik qanigisaani ikiorneqarnissaannut Nunarput tapiissaasoq. Tapiissuteqarnissamut immikkut aningaasanut inatsisitsinni konto-qarpugut tassanngaanniillu atuinissaq politikkikkut isumaqatigiissutigineqarsinnaalluni. Aningaasat pineqartut amerlanngillat annertuumilli ileqqorissaarneq pillugu isumaqarlutik. Taama iliornissamut amerlanerussuteqartitsinngitsoorpugut maannalu oqallisigitikkusupparput nunatut inissisimanerput qanoq ittuunersoq.

Inuit Ataqatigiinnit aamma qimaasunik tigusinnaanissamut piareersartoqarnissaa oqallisigitipparput aalajangiiffissatullu siunnersuusiorsimasinnaalluta. Siunissami nunatta nunarsuarmioqatigiit akornanni sorsunnermit qimaasorpasuaqartillugu inunnik ikittunnguanik tigusinnaanissaa piareersimaffigisariaqaripput Inuit Ataqatigiit isumaqarpugut. Nunarsuarmioqataaantsinni nammaqataaansarput pinngitsoorneqarsinnaanngilaq.

Apeqqutaaginnarpoq Nunarput qaqugu inatsisitigut eqqarsartariaatsikkullu qaqugu tamatumunnga piariissanersoq, tamannaavorlu oqallisissiaq una tunngavigalugu oqallisigitikkusutarput.

Ilisimavarput pineqartumut isummat assigiinngitsuummata nunattalu qanoq inissisimanissaanut ammasumik isertuaatsumillu oqallinnissaq pisariaqartutut isigalutigu.

Partiimut siulittaasutut nunatta ikiuinissamut tapiuteqarnissaanut siunnersuuteqarlunga Naalakkersuisunut ukiarmi allappunga. Naalakkersuisunit Inuussutissarsiornermut, Suliffeqarnermut, Niuernermit Nunanullu allanut Naalakkersuisup Vittus Qujaukitsup ima akissuteqarnera Inuit Ataqtigiit nuannaarutigaarput:

“Isumaqtigaara uani apeqqt assut pingaaruteqartuummat. Taamaattumik danskit Udlændinge, Integrations aamma Boligministeriat Inger Støjberg oqaloqtigaara qanoq illilluta uagut nunatsinniit pissutsinut ilungersunartunut ikiuussinnaanarput pillugu”, aamma “Aningaasanut inatsimmi tunngaviusut iluanni saaffigineqarutta taava Naalakkersuisut pisariaqartumik tarsersorsorneqarnissaq ujartussavaat, ikiosiissutitut pisariaqartumik qimaasunut aningaasiissuteqarnissaq piviusunngortinniarlugu”.

Maannamulli Nunatsinnit ikiuinissamut aningaasaliisoqanngilaq innuttaasullu akornanni qimaasut pillugit oqallinneq sakkortusiartuinnarluni. Naalakkersuisut Nunarput sinnerlugu ikiuisoqarnissaanik siunertaqaraluarsimasut pissutsit paasivagut ikiuinissamulli isumaqtigiinngittoqarnera annertuvallaarsimasoq. Tamanna nipangiutiinnarneqassanngilaq. Ammasumik eqqartortariaqarparput.

Taamaammat Inuit Ataqtigiit oqallinnissaq assut pingaartipparput. Tunngaviusumik naleqartitanut pineqartoq tunngammat, nunatta nunarsuarmioqataasutut inissisimanera Inatsisartuni inuiaqtigiinnilu ammasumik oqallisigitinnissaa pisariaqarpoq. Eqqarsartariaatsit assigiinngitsuupput unali qularutissaanngilaq; nuna namminiilivikkiartuaartoq namminiilivikkusuttorlu nunarsuarmioqatimi akornanni akisussaaffeqaqataanini aamma akuersaartariaqarpaa.

Oqallinnissaq qilanaaralugu Inatsisartut oqaaseqaatissaatut ima siunnersuuteqarpunga:

Inatsisartut Nunatta nunat tamalaat akornanni nunarsuarmioqataasutut inissisimanera naqissuserpaat tassungalu atatillugu nunarsuarmioqtigiit akornanni inuttut pinngortitamiluunniit ajunaarnersuartoqartillugu, ersoqtigiinnerlu tunngavigalugu iliuuseqaqtigiittussaasoqartillugu, pisinnaasavut inissisimanerpullu tunngavigalugit peqataasarnissarput isumaqtigiissutigaarput. Tunngaviusumik nunanut inuiannullu allanut ataqqinninneq tullimullu asanninneq nunatut aamma imminut ataqqinninnerunermik pilersitsisutut isigaarput nunatullu namminiilivikkiartuaartutut akisussaaffinnik aamma tiguisarnissaq Inatsisartut ataatsimoorluta piareersimaffigaarput.